

**REGIONAL NEWS UNIT
ALL INDIA RADIO, AGARTALA
Date: 11-04-2024
Time: 07.35-07.40 AM Hrs
BENGALI MORNING BULLETIN**

Idd Ul Fittar :

দেশের অন্যান্য অংশের সঙ্গে রাজ্যেও আজ ইসলাম ধর্মাবলম্বীদের অন্যতম প্রধান উৎসব ইদ-উল-ফিতর উদযাপিত হচ্ছে। আগরতলা টাউন জামে মসজিদের ইমাম আবদুর রহমান জানান, গতকাল চাঁদ দেখা গেছে। গতকাল ছিল রমজান মাসের শেষ ইফতার। এক মাস রোজার পর ইদ-উল-ফিতর উদযাপিত হয়। এই উপলক্ষে আজ সকাল সাড়ে ৮ টায় আগরতলার শিবনগর গেদুমিয়া মসজিদ প্রাঙ্গণে ইদের বিশেষ নামাজ আদায় করা হবে। এদিকে রাষ্ট্রপতি দ্রৌপদী মুর্মু ইদ-উল-ফিতরের প্রাক্কালে সব নাগরিকদের শুভেচ্ছা জানিয়েছেন। রাষ্ট্রপতি তার বার্তায় ইদ-উল-ফিতর উপলক্ষ্যে, ভারতে এবং বিদেশে বসবাসকারী সকল নাগরিককে, বিশেষ করে মুসলিম জনগণকে শুভেচ্ছা ও শুভকামনা জানিয়েছেন।

BJP press meet-PM visit :

প্রধানমন্ত্রী নরেন্দ্র মোদি লোকসভা নির্বাচনের প্রচারে আগামী ১৭ই এপ্রিল পশ্চিম ত্রিপুরা লোকসভা আসনের সরব প্রচারের শেষ দিনে রাজ্যে আসছেন। প্রদেশ বিজেপি মুখপাত্র সুব্রত চক্রবর্তী গতকাল সাংবাদিক সম্মেলনে জানান, আগামী ১৭ই এপ্রিল পশ্চিম ত্রিপুরা লোকসভা আসনের সরব প্রচারের শেষদিনে দুপুর

১টায় প্রধানমন্ত্রী আগরতলার স্বামী বিবেকানন্দ ময়দানে বিজেপি আয়োজিত নির্বাচনী জনসভায় বক্তব্য রাখবেন। শ্রী চক্রবর্তী আরো জানান, কেন্দ্রীয় স্বরাষ্ট্রমন্ত্রী অমিত শাহ আগামী ১৫ই এপ্রিল কুমারঘাটে বিজেপি'র নির্বাচনী সমাবেশে উপস্থিত থাকতে পারেন।

Homoeopathy Symposium :

রাষ্ট্রপতি দ্রৌপদী মুর্মু বিশ্ব হোমিওপ্যাথি দিবস উপলক্ষে গতকাল নতুন দিল্লির সেন্ট্রাল কাউন্সিল ফর রিসার্চ ইন হোমিওপ্যাথি দ্বারা আয়োজিত দুই দিনের হোমিওপ্যাথি সিম্পোজিয়ামের উদ্বোধন করেন।

অনুষ্ঠানে রাষ্ট্রপতি বলেন, হোমিওপ্যাথি একটি সহজ ও সহজলভ্য চিকিৎসা পদ্ধতি হিসেবে অনেক দেশেই গৃহীত হয়েছে। সারা বিশ্বে, আন্তর্জাতিক, জাতীয় ও স্থানীয় পর্যায়ে অনেক প্রতিষ্ঠান হোমিওপ্যাথির প্রচার করছে। রাষ্ট্রপতি বলেন, একবিংশ শতাব্দীতে গবেষণার গুরুত্ব ক্রমাগত বাড়ছে। তাই এই সিম্পোজিয়ামের বিষয়, "গবেষণার ক্ষমতায়ন ও দক্ষতা বৃদ্ধি", খুবই প্রাসঙ্গিক।

তিনি বলেন, সুস্থ মানুষরাই সুস্থ সমাজ গঠন করে। সুস্থ সমাজের ভিত্তির ওপর গড়ে ওঠে একটি সুস্থ জাতি।

Polling person Training Jirania:

পশ্চিম ত্রিপুরা সংসদীয় নির্বাচনী ক্ষেত্রের জিরানীয়া মহকুমায় ভোটগ্রহণ কর্মীদের এক মহড়া অনুষ্ঠিত হয় গতকাল। জিরানীয়ার অগ্নিবীণা টাউনহলে অনুষ্ঠিত এই মহড়ায় খয়েরপুর, মজলিশপুর ও মান্দাইবাজার বিধানসভা ক্ষেত্রের ৫২ জন রিজার্ভড ভোটগ্রহণ কর্মী মহড়ায় অংশ নেন।

Rajyapal, Eid:

রাজ্যপাল ইন্দ্রসেনা রেডি নানু ঈদ-উল-ফিতর উপলক্ষে রাজ্যবাসীকে আন্তরিক শুভেচ্ছা ও অভিনন্দন জানিয়েছেন। এক শুভেচ্ছাবার্তায় রাজ্যপাল বলেন, 'পবিত্র রমজান মাসের শেষে ঈদ-উল-ফিতর উদযাপন করা হয়। এই মাসে সমস্ত মানবজাতির জন্য সর্বেশ্বরের কাছে আশীর্বাদ, ক্ষমা ও দয়া প্রার্থনা করা হয়। পবিত্র রমজান মাস পালন করা হয় মানুষের প্রতি শুভকামনা ও দয়ালতা জাগ্রত করার জন্য। এর মাধ্যমে সকলের জন্য, বিশেষ করে দুর্বল, দরিদ্র, পিছিয়েপড়া মানুষদের প্রতি দয়া ও দানশীলতার বিষয়ে আমাদের দায়িত্ব স্বরণ করিয়ে দেয়।' রাজ্যপাল আশা প্রকাশ করেন এই উৎসব রাজ্যবাসীর জন্য আনন্দ, ভালবাসা, সুখ-শান্তি, সমৃদ্ধি নিয়ে আসবে এবং সৌভ্রাতৃত্ববোধ জাগ্রত করবে।

Car Rally : উনোকোটি

কৈলাশহর মহকুমার ইরাণী থেকে গতকাল পুলিশ প্রশাসনের উদ্যোগে লোকসভা নির্বাচনকে সামনে রেখে "কার রেলি" শুরু হয়। উপস্থিত ছিলেন, উনোকোটি জেলার জেলা শাসক দিলীপ

কুমার চাকমা, অতিরিক্ত জেলা শাসক অর্ঘ্য সাহা, পুলিশ সুপার কান্তা জানগির প্রমুখ। পুলিশ সুপার জানান, নির্বাচনকে সামনে রেখে জনমনে আস্থা ও বিশ্বাস বাড়ানোর জন্য এই কর্মসূচির আয়োজন করা হয়।

Polling personal Training:

উত্তর জেলার পানিসাগরে মহকুমা শাসকের কার্যালয়ে গতকাল ৩১ জন ভোট কর্মীকে প্রশিক্ষণ দেওয়া হয়। এই ভোট কর্মীরা আগামী ১৭ এবং ১৮ই এপ্রিল ৮৫ বছরের উর্ধে বয়স্ক ভোটার এবং দিব্যাঙ্গ ভোটারদের বাড়ি বাড়ি গিয়ে ভোট গ্রহণ করবেন।

CM , Ratan lal nath , prachar :

বিজেপি নেতা তথা মুখ্যমন্ত্রী অধ্যাপক ডাক্তার মানিক সাহা গতকাল বড়দোয়ালিতে দলের বিভিন্ন স্তরের কার্যকরতাদের নিয়ে বৈঠক করেছেন। পশ্চিম লোকসভা আসনে দলের প্রার্থী বিপ্লব কুমার দেবকে বড়দোয়ালি বিধানসভা কেন্দ্রের প্রত্যেক বুথে ভোটে এগিয়ে রাখতে কার্যকরতাদের বলেছেন শ্রী সাহা। এদিকে, মোহনপুর মহকুমার লেফুঙ্গায় যৌথ নির্বাচনী অফিসে বিজেপি, তিপুরা মথা এবং আইপিএফটি নেতাদের সঙ্গে বৈঠক করেছেন বিজেপি নেতা তথা বিদ্যুৎ মন্ত্রী রতনলাল নাথ। তিনি বৈঠকে বলেন, জনজাতি অংশে বিজেপি প্রার্থী বিপ্লব কুমার দেবের হয়ে প্রচার ও প্রসার চালিয়ে যেতে হবে।

Door to Door polling Jirania

পশ্চিম ত্রিপুরা সংসদীয় নির্বাচনী ক্ষেত্রের সাধারণ পর্যবেক্ষক বিবেক এল ভিমানওয়ার গতকাল খয়েরপুর ও মজলিশপুর বিধানসভা কেন্দ্রে বাড়ি বাড়ি ভোটগ্রহণ পরিদর্শন করেন। ৮৫ ঊর্ধ্ব ও দিব্যাঙ্গজন ভোটারদের বাড়ি বাড়ি ভোটগ্রহণ শুরু হয়েছে গতকাল থেকেই। সাধারণ পর্যবেক্ষক বিবেক এল ভিমানওয়ার এদিন জিরানীয়া মহকুমায় এআরওদের সাথেও নির্বাচন সংক্রান্ত বিষয়ে এক বৈঠক করেন।

congress meeting :

লোকসভায় পশ্চিম আসনের প্রার্থী আশিস কুমার সাহার সমর্থনে গতকাল সন্ধ্যায় নেতাজি চৌমুহনীতে এক সভা হয়। এই সভায় ভাষণে কংগ্রেস বিধায়ক সুদীপ রায় বর্মণ বলেন, গণতন্ত্র পুনরুদ্ধারের লড়াইয়ে জনগনকে জিততে হবে। বৈচিত্রের মধ্যে ঐক্য আমাদের দেশের অন্যতম মূল বৈশিষ্ট্য। এই বৈশিষ্ট্যকে ধরে রাখতে ইন্ডিয়া জোট তৈরি হয়েছে। সভায় ভাষণ রাখেন ইন্ডিয়া জোটের কংগ্রেস প্রার্থী আশিস কুমার সাহা। এদিনের সভায় বিজেপির প্রাক্তন বিধায়ক অরুণচন্দ্র ভৌমিককে দলে স্বাগত জানান বিধায়ক শ্রী রায় বর্মণ, কংগ্রেস নেতা আইনজীবী পীযুষ কান্তি বিশ্বাস সহ অন্যান্যরা।

Weather :

আজ আকাশ আংশিক মেঘাচ্ছন্ন থাকবে। কিছু কিছু জায়গায় হালকা বৃষ্টিপাতের সম্ভাবনা রয়েছে। তাপমাত্রা সর্বোচ্চ ৩৫ ডিগ্রী

এবং সর্বনিম্ন ২৫ ডিগ্রী সেলসিয়াস এর কাছাকাছি থাকবে। আজ ভোরের সর্বনিম্ন তাপমাত্রা ছিল ২৬.৪ ডিগ্রী সেলসিয়াস। আগামী চব্বিশ ঘণ্টায় রাজ্যের বেশ কটি জেলায় বিক্ষিপ্ত ভাবে বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সতর্কতা জারি করেছে আবহাওয়া দপ্তর।
